



UKA 2025/61

22/10-2025

Margrethe Thårup Andersen

Siunissami pisariaqartitsinerup qulakkeerneqarnissaa siunertaralugu Ilisimatusarfimmi ilinniarteqarfiup illutaatalu annertusineqarneranni aningaasaqarnikkut allaffissornikkullu kingunerisassat misissorneqarnerannik imaqtumik nassuiaasiornissamik Naalakkersuisut peqquneqarnissaannik Inatsisartut aalajangiiffigisassaattut siunnersuut. Nassuiaammut atatillugu sukumiisumik misissorneqassaaq, danskit nunanilu allani aningaasaateqarfiit assigisaallu aningaasalersorneranut akuutinneqarsinnaanersut. Nassuiaat Inatsisartunut agguanneqassaaq 1. januar 2027 nallertinnagu. (Inatsisartunut ilaasortaq Jørgen Rosbach, Demokraatit) (Siullermeerineq)

Demokraatit Inatsisartunut ilaasortaata Jørgen Rosbach-ip siunnersuutaanut pitsaasumut qujanaq.

Ilinniartitaanermut aningaasaliineq, inuiaqatigiittut iliuuserisinnaasatta pingaarnersaasut ilagaat. Ilinniartitaaneq aqutigalugu sulisunik piginnaasalinnik pilersitsisarpugut, tamat oqartussaanerit nukittorsartarparput, naligiissitsineq siuarsartarparput, nunamilu tamarmi ineriartorneq qulakkeertarlutigu.

Suliami tassani Ilisimatusarfik qitiulluinnartumik inissisimavoq. Ilisimatusarfituaanermi nangitsilluni ilinniarnerni pingaarutilimmik inissisimallunilu suliatigut, ilisimatusarnermut, kulturikkullu ineriartortitsinermut ingerlatsiviuvuq. Ilinniartitsisunngorniat, inatsisilerituunngorniat, uumassusilerisunngorniat, inuiaqatigiilerinermik ilisimatusartunngorniat, allarpassuarnullu ilinniartut tassani ilinniartarput. Ilutigisaanik eqqarsaatigisassanut, oqallinnernut, ilisimasani avitseqatigiittarnernut katersuuffiuvuq. Siunissarput tassani pilersinneqarlunilu ilusilersorneqartarpoq.

Ilisimatusarfilli ullumikkut annertuunik unamminartitaqarpoq. Illu ilinniartunut 100-t sinneqalaaginnartunut inissaqartillugu pilersinneqaaqaarnikuuvuq, ullumikkulli 600-t sinnerlugit Ilisimatusarfimmiittarlutik. Amerliartuinnartut nangitsillutik ilinniartarnerinik tamanna takussutissaavoq, inissaalatsinerujussuarmilli aamma kinguneqarpoq. Ilinniartorpassuit, ilinniartitsisorpassuillu ullumikkut naammaginngitsunik atugaqarput, tamannalu ilinniartitaanerup pitsaassusianut, atugarissaarnermullu sunniuteqarluni.

Pingaartumik ilinniartitsisunngornianut, peqqissaasunngornianullu naleqquttunik atuartitsiveqaranilu atortoqannginnera unamminarpoq. Taassumap kingunerisaanik ilinniartitsineq piumasarineqartutut ingerlanneqarsinnaajuaannarneq ajorpoq. Allaas sulinermit avatangiisitigut ajornartorsiuteqarneq patsisaalluni atuartitsiviit matuneqartarsimapput. Tamanna peqqinnissaqarfimmi, ilinniartitaanermi, inuiaqatigiinnilu siunissami qitiusumik inissisimasussanik Ilisimatusarfimmi ilinniartitsisussaasumi attanneqarsinnaanngilaq.

Ilisimatusarfiup illutaa allilerneqaruni illumi atugassarititigut unamminartut aqqiivigineqarlutillu



DEMOKRAATIT

ilinniarnissamut, suleqatigiinnissamut, atugarissaarnissamullu nutaamik periarfissiissagalarpoq. Assersuutigalugu ataatsimoortarfik anginerusoq imaluunniit minihaali timersornernut, suleqatigiilluni suliaqarnernut, kulturimut tunngasunik ingerlatanut, akimortumillu aaqqissuussinernut atorneqarsinnaassaaq, tamannalu ilinniarnermi peqatigiinnermut suliatigullu nukittorsaaqataassalluni. Alliliinissamut pisariaqartitsinerup misissoqqissaarneqarnissaanut suliniut UPPIK, Ilisimatusarfiup ineriartortinneqarnissanik ukkataqartoq aqqutigalugu Ilisimatusarfik nammineerluni suliniuteqareermat aamma erseqqissaatissaqqippoq. Siunnersuummi matumani anguniarneqartutut ataatsimut nassuiaat tamatumunnga ilisimasaqalersitsissaaq, aningaasaqarnikkut aamma allaffissornikkut kingunissaanik naliliissaaq, siunissamilu aalajangiinissamut tunngavissiilluassalluni.

Tassunga atatillugu avataanit aningaasaliisinnaasut akuutinneqarnissaannut periarfissat misissoraanni isumatusaarnerussaaq. Inuiaqatigiinni suliniutini annertuuni allani misilittakkat takutippaat ilinniartitaanermut, inuiaqatigiinnullu ersarissumik siunertaqartunut Danmarkimi aamma nunat tamalaat akornanni aningaasaateqarfiit tapersersuerusussuseqakkajuttartut. Ilisimatusarfiup allilerneqarnissaa taakkunannga tapersersorneqarsinnaassanersoq misissugassaqqissaaq.

Tamanna pillugu Demokraatit nangaassuteqaratik siunnersuut tapersersorpaat. Namminersornissamut, naliigiissitsinermut, ineriartornermullu ilinniarneq tunngaviuvoq, suliaassallu taassumap kivinnissaanut sinaakkutaasariaqartunik Ilisimatusarfiup sinaakkuteqarnissaa pingaaruteqarpoq.

Taamatut oqaaseqarlunga inassutigaarput siunnersuut akuersissutigineqassasoq aamma Kultureqarnermut, Ilinniartitaanermut, Ilisimatusarnermut Ilageeqarnermullu Ataatsimiititaliami oqaluuserineqassasoq.